



**H**Einricus quintus (cognomento iunior dictus) dux Frāconia, filius fuit Heinrici quarti Cæsaris, & Berthæ Marchionissæ Italia. Hic in adolescētia optimē educatus, atq; literis & armis institutus est. Vir uerò factus natura erat bellicosissimus & audax, qui breui sibi totum Imperium subiecit, ac omnibus iugum imposuit. Cum autē Heinricus pater pontificum iniuria anathemate notatus, atq; eius subditi iuramento soluti essent, filius quoq; Episcoporum impulsu & suasu cum alijs principibus eū persecutus est. Omnes enim Germaniæ principes (duce Magno Saxone excepto, qui ob aduersam ualetudinem adesse nequie-

uerat) Moguntia conuentum agentes, Heinrico patri persuaserant, ut ad cauendum tumultum, quo periclitari posset, filio regalia Imperij, crucem, lanceam, sceptrum, & coronam traderet. Id quod & fecit. Vnde is ibidem rex electus, ac ab Apostolicis legatis per manuum impositionem confirmatus est.